


# BUPWÀNGÀNE

 ...Ne kwikala kaaba aka bwà kukuukwilakù pàmwè neenù. Nènkù mpindyewu ànu kumpàlà kwà Diyiisha, ndi ne mulundà wànyì mwímpè mwaba ewu pa cibùmbà cyà ku cyambilu apa dilòòlò edi, Docteur Lee Vayle, wa mu èkèleeziyà wa Kumpàlà wa ba-Baptistes wa mu Lima, mu Ohio, uvwa umwe wa ku bàntùüdidi bàà mfrangà mu disangisha dyà mu Lima. Mwawa mumukonkè, patùvwà twenda tupweka dilòòlò edi, ní kí mmufwànyineku kwambila disangisha diyì, pamwápà dyà ditàngila disangisha dyà mu Lima, bwà kasunsa kàmwè anyì túbìdi tùdi tulongà etu. Nènku ndi ne disànkà dyà, musànke bwà kunùleeja dilòòlò edi, Docteur Lee Vayle, Baptiste mukwàbò udi mupetè Nyumà Mwímpè. [Katùpà kàà mukàbà wà méyi munda mutupù—Muf.]

2 Amen. Nzambì àkubènèshè pèèbè, Mwanèètù Vayle.

3 Aci's civwa cyùmvwika cicolè be bwà mpaasàtà wa ba-Baptistes, kí mmwòmò anyi? Èè, tudi ne disànkà dyàbùngì dyà kwikalakù apa ne Mwanèètù Vayle. Nènku ncyà bushùwà ne biibi bìdi bwàshì bwà yéyè kwalukila ne kutùkumbulakù cikondo kanà cyòonso cyàkòòkeshayè aci. Nènku mpindyewu dilòòlò edi. . .

Mààlabà dilòòlò kùdi—*Dijiikiibwa* dyà Mukalenge Yesù.

4 Dyàlumingu mu dindà kùdi disangisha dyà dijuukà dyà dîbà pa dîbà isambòmbò jaajaaja. Nènku ndi ngeela meeji ne mwanèètù mmumanyishe citùpà cidi cilondà cyà disangisha.

Mpindyewu twánjààyì ànu kusambila bwà katanci kakesè cyanààna.

5 Mukalenge mubènèshìibwè, Dîyi Dyèbè m'Bulelèlè, ne tudi ne disàkidila bwà bántu bàdi bàDikwàta, kabàyi ne bwòwà to, pàdìbo bàDìpèèsha bantu apu. Nènku patùdi tubuulula Bible dilòòlò edi apa, anyì tubuulula mabèji Èndè, swàku bwà Nyumà Mwímpè mubènèshìibwe awu àlwe kutùkàngwila Dîyi dyà luumvu. Mu Yesù Kilistò, mmutùdi tulòmbela nùnkù. Amen.

6 Dilòòlò dyà butùmbì ditùdi tutwà cyanga edi, dyà dipoopediibwa pa nkùrusè dyà Mukalenge wetù mubènèshìibwè awu, Dilòòlò edi ndi njinga kubala Méyi mafùmine ku mishikù Yèndè Sungasunga yà mushinga mukolè, Méyi àdiYe mufùndishe mu Mukàndà Wèndè. Mu Maatààyì Munsantu, nshapità mwi4, tudi. . . ku mvensà wa 47 ne wa 48, tudi tubala nùnkù ewu:

*Nènku panwikalà nwènù nwela ànu bânà bèènù nkààyaabò mwoyi, cinùdi nwènù nwenza citàmbe cyà bakwàbò ncinyi? nànsha bampùbilikaanò pààbò kabátu benza nànkù anyi?*

*Kàdì ki bwà cinyì ikàlaayi bapwàngàne, ànu mùdì Taatù wenù udi mu dyulu mwikàle mupwàngàne amu.*

<sup>7</sup> Nènku dilòòlò edi tudi bamanýishe ne netwàkulè pa cyena-bwalu cyà *Bupwàngàne*. Mpindyewu tudi . . . Aci's cidi cimwèka bu cyena-bwalu cyà pabwàci menemene cyà kwangata dilòòlò dyà dipoopediibwa dyà pa nkùrusè dyà Mukalenge wetù. Kàdì leelù ewu, pamwápà, nudi batèlèje ku tudyòmbà, ne buumvwè mayiisha ne baamisanjeela bashiilèshiiilàngàne, mùshindù wùdìbo baleejè ditùkù dinènè didi dikwàcishà bwòwà dyàkafwà Mukalenge wetù bwà mpèkaatù yà bàà pa buloba adi. Pa nàнку ndi musungùle, dilòòlò edi, bwà kunyunguluka mu mùshindù mushiilàngàne bwà kufikakù, bwa kwikalaci cishiilàngàne ndambù ne cifwànyineku kunupèèsha cyashima ndambù. Nènku swàku bwà Nyumà Mwìmpè mubènèshiiibwe awu àsonsolè Dìyì mpindyewu patùdi tuditàcisha bwà kuDìtwàla apa.

<sup>8</sup> Nzambì ùdì ùlòmba bupwàngàne. Tudi baswè kulama cyòci aci mu meeji ne, kakwèna cintu nànsha cimwè cyà citùpà cidi mwà kubwela mu Bwikadi bwà Nzambì to. Cidi ne cyà kwikala cipwàngàne, dikuukwila dyètù, bikwàbò byònsò.

<sup>9</sup> Mpindyewu, mu budimi bwà Èdèna, Nzambì wàkatèeka Adàmà ne Evà mu budimi amu. Kàdì bààkenza mpèkaatù ne bààkashipa mikenji yà Nzambì, mu kwenza kwà mpèkaatù, ne cishikù. Ne pàdì dishipa dyà mikenji dilwa, cishikù ndishipa dyà mikenji. Ne mukenji wà Nzambì, Yèyè mwikàle wa cijila, ànu wa cijila wa kàyì musopakaja ewu, ki bwà cinyì katobà nànsha kamwè kàà dipangila dyà cijila kakeèna mwà kwimanakù mu Bwikadi Bwèndè nànsha. Pa nàнку, piikalàbi ne mpèkaatù wàkabwela pa buloba ku dishipa dyà mikenji, dìbà adi bìdì bikèngela kutàngila bwalu bwà mpèkaatù kumpàlà kwà ngènzàmpèkàatù kwimanayè mu Bwikadi bwà Nzambì.

<sup>10</sup> Mpindyewu, kwòkò kakùyì mukenji to, dìbà adi kakwèna bwakàne nànsha. Kàdì mukenji wùvwa wùlòmba, anyì bwakàne bùdì bùlòmba mukenji kampànda. Nènku mukenji, pàdiwu— ubiikidiibwa mu cyalu, wùdì wùkùpa bwakàne.

<sup>11</sup> Mpindyewu, ku mikenji, kakwèna mubidi nànsha wùmwe wùdì wùsùngidiibwà to. Mpindyewu, mikenji kayèèna mwà kutùsùngila to. Mikenji yìvwa ànu cintu cìvwà citwélè mu bùlokò, kàdì kayèèna ne bukòlè bupikudi to. Mikenji yìvwa yitùleeja ànu ne tuvwa bàngènzàmpèkàatù, ne yitùpiisha. Ki cidi mikenji ne cyà kwenza ncyòci aci. Mbwà kutwala dipiila, anyì bwà kukuleeja mwaba wùdì cilèmà cyèbè. Pa nàнку mikenji, mu yòyì miinè, kayìvwa mwà kusùngila to. Yìvwa ànu mwà kufùnda ku cilumbù.

<sup>12</sup> Nàнку Nzambì, mwikàle wa cijila ne mwakàne, bìvwa bikèngela bwà kwikalaYe ne difùnda cya ku cilumbù. Bìvwa bikèngela bwà kufùndaYe ngènzàmpèkàatù bwalu ùvwa

musambùke mikàlù yà ngàsà, ne mulwè mwena mwàbò mushipi wa mikenji. Dìba adi, bàdi ne cyà kutàngila bwalu bwèndè.

<sup>13</sup> Nènku mukenji ne mukenji wônso wùtu ne cibawu, bwalu, cibawu cyà dishipa dyà mukenji wà Nzambi ndufù. Nènku cìvwa ne cyà kukùpa lufù mu bukwàbantu. Nènku bukwàbantu bwónsò bùdi mwinshi mwà cibawu cyà mukenji ewu.

<sup>14</sup> Mpindyewu pààkenzà Adàmà ne Evà mpèkaatù, kakùvwakù mùshindù nànsha wùmwè to, kakùvwa búngà bwanga bwà lwondàpù buvwà bufwànyinekù kwimana mu Bwikadi bwà Nzambi to, ànu bôbò batàngile cilumbù cyà mpèkaatù ewu. Ne muntu nànsha umwe kèna mwà kwenza mpèkaatù nànsha bàmwamba ne ngwà mùshindù kaayi, nànsha yèyè mukesè anyi munène wa bìshi, bikèngela kutàngila cilumbù cyà mpèkaatù umwe awu kumpàlà kwà ewu udi mumwenzè kumónayè mwà kwimana mu Bwikadi bwà Nzambi wa Cijila.

<sup>15</sup> Nànku, ki bwà cinyi, pàvwà Adàmà ne Evà benzè mpèkaatù ne bashipè mikenji, bàvwa bàà lufù. Nènku mikenji yìvwa ne cyà kutèekiibwa mu cyenzi, ki bwà cinyi cyàkeela bukwàbantu bwónsò mwinshì mwà cibawu cyà lufù. Mpindyewu bu twètù ànu mwà kwanji kushààla basòmbèle panshi bwà katanci kakesè mpindyewu, mu ngeelèlù wetù wa meeji, ne kutàngila cimfwànyì cinène eci, ne kuvùluka ne muntu yônso udi mwab'ewu mmubadila mu cyôci eci. Mulùme yónsò ne mukàji, mwànà, mmubadila mu cibawu cyà lufù, ku dishipa dyà mikenji dyà mutù mupùngila-makunyì wa bukwàbantu, Adàmà; ku dishipa dyèndè dyà mikenji, yônso wa kutùdi wàkalwa mukwàciibwe kùdi mpèkaatù.

<sup>16</sup> Nènku bàdi ne cyà kutàngila bwalu bwà mpekaatu. Pa nànku, Nzambi, mu ngiikàdilù Wendè munène wa kàyì mikàlù ne dinanga Dyèndè dinène. . . Mikenji yìvwa ne cyà kutàpulula ngènzàmpèkàatù ne Mufùki wendè; dîbà adi uvwa ubùtùdiibwa, ne ubùtùdiibwa yônso nkòong, kakùvwakù kufwànyine kwikala mùshindù wà yèyè kwalukila to ànu batàngile cilumbù cyà mpèkaatù. Nènku mbifwànyine kwikala bipeepèle dîbà adi bwà kwitabuuja dibutudiibwa dyà mu kaabujimà dyà ngènzàmpèkàatù ku ndekeelu, bwalu yèyè mmutàpùlùdiibwe mu kaabujimà, kashidi ne Bwikadi bwà Nzambi.

<sup>17</sup> Mpindyewu mònaayaaku mpèkaatù ewu. Ne mùdi Nzambi, mwikàle mwakàne, ne Yèyè kàyikù mwà kwenza nî ncinyi cikwàbò pa kuumusha kwikala mwakàne, bwalu Yèyè ùdi mushimi wà bwakàne bwónso, dîbà adi kakùvwa kufwànyine kwikala ní ncinyi cikwàbò cyà Yèyè kwenza pa kuumusha ditèekà dyà cibawu bwà dishipa dyà mikenji edi. Nènku cibawu cìvwa ndufù, bwalu Yèyè wàkamba ne: “Ditùkù dinwàdyàkù, ditùkù adi ndinwàfwà bulelèlà.” Mpindyewu, ncimfwànyì cifiike fitùtù citùdi naaci mwab'ewu.

18 Kadi díbà adi twètù baalùkilekù paanyimà kakesè, ne bajandùle byàmbibwà mene byà Nzambi, Bible udi ùtwàmbila patòòkè ne “Nzambi ùdi dinanga.” Kàdi nànsha nànkù, bu mùdìYe dinanga, Ùdi ne cyà kwikala mwakàne. Pa nànkù, dinanga kadyèna dyùmviwija ànu cintu kampàndà cidìbo mwà kwengeleka ne kunàya naaci to. Dinanga mbwakàne bwà Nzambi.

19 Mpindyewu, pàakamòna Nzambi ne bânà Bèndè bàvwa bashipè mukenji Wèndè, ne bàvwa ne cyà kufwà lufù, díbà adi ki dinanga didishikàmìne kubweladi mu cyalu bwà kupanda njila. Bwalu, Nzambi wàkamòna ne bânà aba bàvwa ne cyà kubùtudiibwa kakùyì mpatà to, buumùshùbwe kashidi mu Bwikadi Bwèndè. Kakùvwa cikwabo nànsha cimwè cyà dyenza to, bwalu bàvwa bashipè mukenji Wèndè, ne cibawu cyà mukenji Wèndè civwa ndufù.

20 Ki dinanga dyà Nzambi kupàtukadi bwà bantu Bèndè. Nènku pàdì dinanga dyà Nzambi òvuma, ngàsà mudishikàmìne ùdi ùlela cintu mene cyà dinanga adi. Nènku Nzambi, ku didyànjila-kumanya, pàakatàmbàYe kunanga cisà Cyèndè; nànsha nànkù, ne cibawu aci, Yèyè wàkenza bwà lufù lwà mupinganyi kwangatalù kaaba mu budimi bwà Edènà. Mbwena kwamba ne, Wakapingajapù cifùkiibwà civwà kaciyi cyenze bwalu, mwànà wa mùkòòkò mukesè uvwa kayi mumanye mpekaatu to, nènku cyàkaya bu mupinganyi, bwà kwenza mudimu ne kufwà pa kaaba kàà ngènzàmpèèkààtù mupiile awu. Nènku uvwa mmwànà wa mùkòòkò, mushipa, bwà kulama mwoyi wà bantu Bèndè.

21 Mu Dipungila Dikùlukulu dijimà bàvwa bàlàmbula mashi à bânà bàà mikòòkò ne à mbùji, mikòòkò, ne ngombe ne nkùngùlù yà ngombe, lufù lwà mupinganyi. Kàdi, byònsò mu cibucilu cinène cyà Nzambi, kùvwa mu meeji Èndè Cintu cilelèlè cilwa, civwà cifwànyine kwikala. . . Byòbì abi bìvwa mindidimbì yà Cintu cilelèlè civwà ne cyà kulwa. Nènku Cintu cilelèlè civwa ne cyà kulwa, civwà Mwàn'Èndè umwèpelè mulela awu. Bânà bàà mikòòkò bònsò bàvwa bàfwa abu bàvwa ànu mundidimbì cyanàànà. Nènku mundidimbì wùdi ànu luseke lwà ciibùlòjì cyanàànà lwà cintu. Nènku bòbò bàvwa bàmba ànu bwà dilwa dyà Kàlvaryò.

22 Mpindyewu bwà cimfwànyì cyà cyòci eci, tùbuululààyaaku mu Bibles yètù, mu Mukàndà wà Ebèlù, twàngatè mwaba ewu cidì Pòlo, mùpostòlò munène ewu wàmba, ùteeta bwà kutùtàpulwila bintu ebi. Mu nshapità wa 10 wa Mukàndà wà Ebèlù, mmutùdi tubala cyòci eci.

23 Nènku mèmè ndi ànu munangè Díyi's! Díyi m'Bulelèlè. Ne ntu muswè kuDìbala kumpalà kwà disangisha dyànyì, bwalu ndi mumanyè ne ku cilumbulwidi nèngiimanè naabò. Kàdi bidi bikèngela bwà mèmè kulumbululà's. Pa nànkù mèmè

muCìpàtwìle mu Dìyì, dìbà adi ncyàkwikala mupùile to; bwalu Cìdi n'Dìyì, ne Nzambi ngudi mwambùle bujitu bwà Dìyì Dyèndè.

<sup>24</sup> Tudi tumòna byàbùngì leelù ewu, byà batangadiki ne bikwàbò, bìibakaa beeyèmène bantu. Kaa, s'ncintu cyà bundù be! Nènku tudi tusangana, mu dibwela dyà mu maèkèleeziyà ne, tudi tubwela mu èkèleeziyà ne nukasanganamù mpaasàtà kampàndà, mwiikàle ne kaacyenzi kampàndà kakesè kàà pabwàkù, kààdisaluka kampànda kakesè. Nwènù kanùyì batàbàlèlèle to, disangisha dijimà nedyàngatè nyumà awu. Yèyè mwiikàle ànu ne disaluka ndambù, anyì unyungisha mutù, anyì kaacintu kampàndà kakesè kàà mùshindù wà pabwàwù, èè, èkèleeziyà mujimà neadibwinkèmu. Nènku leelù ewu, mu èkèleeziyà yètù yà cyena leelù eyi, tudi bafikè mu mùshindù wà biikàle masaluka ne tuubintu tukesè twà mùshindù awu. Kàdi cikaadi cimvundù cyà òyì òlèlè's! Kàdi, kaa, bânà bèètù bananga, bu ne kùvwakù cikondo civwà cikèngelà bwà twètù kushàala pa Dìyì, s'ndeelù ewu!

<sup>25</sup> Nudi numòna's, mèmè ndi mufwànyine kuumvwa bibi bwà kukiimana ku cilumbulwidi mwikàle mumanyè ne mvwa ne kantu kakesè kàà mukodikodi kàà kàadibuulula kampàndà kakesè kàà pabwàkù, eku mupàmbwìshe bantu. Ncyèna muswè bwà bóbò kwangacila nyumà wanyì pa cyenzi cyànyì to, kàdi ndi muswè bwà kwikadilabò ne Nyumà wa Nzambi ku Dìyì dyà Nzambi, dìdì ditwàla Bulelèlè.

<sup>26</sup> Pa nàнку mu mpùngà munène ewu dilòlòlò edi, ndi muswè kubala mu Dìyì dyà Cyendèlèlèlè dyà Nzambi. Mpindyewu tudi tusangana ne mikenji yikaavwakù bidimu byàbùngì, kàdi mikenji kayiyikù mwà kuumusha mpèkaatù to. Ànu múnkaadiku mwambambe ne, yivwa ànu nzùbu wa bùlokò. Yivwa cijandudi cinène civwà cikwambilà cyùvwà mwenzè, kàdi kàciyi ne bwanga bwà kukusùngila naabù to. Civwa cikutèeka mu nzùbu wa dyeyeka bintu, kàdi kakùyì Mupikudi bwà kukupàtulamù to, ne cyòci aci. Cìdi ànu cikwela mu bùlokò cyanàànà, bwà kukufikisha ku dimanya ne uvwa ngènzàmpèkààtù. Kàdi mònaayi mpindyewu mu Ebèlù, nshapità wa 10, patùdì tubala apa.

*Bwalu mikenji bu muvwàyi ne mundidimbì wà bintu  
bimpè bicivwà bilwa, kàdi kayiyì cimfwànyì ciinè to . . .*

<sup>27</sup> Vùlukàayi ne, yivwa mundidimbì wà cimfwànyì civwà cilwa. Mundidimbì wùdi wùleeja ànu ne kùdi cimfwànyì cidi cyèza mundidimbì awu. "Mundidimbì wà bintu bicivwà bilwa, kàdi kayiyì cimfwànyì ciinè to." Mònaayi, "cyà bintu . . ."

*. . . cimfwànyì ciinè cyà bintu, kayènakù ku milàmbù  
yivwà yifidiibwà . . . misangu ne misangu ayi mwa  
kuwiija uvwa ulwa awu ku bupwàngàne nànsa.*

<sup>28</sup> Mpindyewu, Nzambi, ku cibangidilu, ùvwa ùlòmba bupwàngàne. Yesù, pàakalwàYe pa buloba, wàkamba ne: “Ikàlaayi bàpwàngane, bu mùdi Nzambi mu Dyulu mupwàngàne.” Nènku mikenji, bu muvwayi ne mundidimbì wà bintu bicivwà bilwa, kayivwakù mwà kuvwija mukuukwidi mupwàngàne to. Nuumvù cimfwànyì aci anyì? Mpindyewu tucyàngàtaayi cyàkàbìdì bwà nwikalè batwishiiibwe ne kî ncinùpìte to. Nzambi ùdi ùlòmba cijila cipwàngàne. Muntu nànsha umwe kèna mwà kwimana mu cimfwànyì Cyèndè, mwikàle ne katobè kamwè kàà mpèkaatù nànsha. Yesù wàkajaadika byà mwomùmwe, wàmba ne: “Ikàlaayi bapwàngàne, ànu mùdi Nzambi mu Dyulu mupwàngàne.”

<sup>29</sup> Ne Bible mmwambè ne: “Mikenji, ne milàmbù yàayi ayi, kayivwakù mwà kuvwija uvwa ulwa awu mupwàngàne to.” Dìbà adi, mikenji kayivwakù mwà kupwàngàja cintu nànsha cimwè to. Yòyi yivwa ànu mufunkunyi cyanààna. Milàmbù eyi, yifidiibwa ku cidimu cyònsò, kayivwakù mwà kuvwija mukuukwidi mupwàngàne to. Kì bwà cinyi, muntu nànsha umwe mwinshi mwà mikenji, anyi ùlama mikenji, anyi mwinshi mwà mindidimbì, kàvwakù mwà kwikala mupwàngàne to.

*Bwalu (mvensà mwi2) nènku kabàvwa mwà kwikala balekèle bwà kwikala kuyifila? . . .*

<sup>30</sup> Kwòkò cintu kampàndà cindiku mwà kwenza bwà kudivwija mèmè mwine mupwàngàne mu Bwikadi bwà Nzambi, nànkù kabivwa bikèngela bwà Kilistò kufwàYe bwànyì mèmè to. Kwòkò cintu cimwèpelè cyùdiku mwà kwenza, cidì cifwànyine kukumbanyina cintu kanà cyònsò mu Bwikadi bwà Nzambi, dìbà adi's Kilistò wàkafwà cyanààna. Kì ndilama dyà mikenji, kî mmwènu yèbè yà ne ànu mikenji, nànsha cijila cyèbè cyà mu wèwè aci, kî mbintu byùdi mufwànyine kulekela kwenza, kulekela kushima, kulekela kwìba, kulekela dinwà dyà mfwankà to, kulekela diya kabandila sèndèmà to, wèwè ucidì ànu mujimine. Cintu nànsha cimwè kaciyèna mwà kucyènzakù to! Dikashàala wa mu maèkèleeziyà, mishingà, dyenza dyà mishingà, mabàtiiza, mèyi matùma a èkèleeziyà, dibala dyà twitabàayi, dyamba dyà masambila, bintu byònsò abi kî mbifwànyinekù kwikala ne mushinga to. Udi mujimine! Kakwèna cintu nànsha cimwè cyùdiku mwà kudyènzela mu wèwè mwinè to, bwalu udi ngènzàmpèkàatù mwinshi mwà dipiila. Nènku kakwènakù mùshindù nànsha wùmwe mu wèwè mwine to, twitabaayi nànsha umwe, anyì cintu kampàndà cyùdiku mufwànyine kwenza anyì kwelela meeji to, cyà mu wèwè, cìdiku cifwànyine kukumbanyina cintu kampàndà mu Bwikadi bwà Nzambi to, bwalu wèwè udi ngènzàmpèkàatù ànu kwìnè kwònsò aku.

<sup>31</sup> Nènku Bible ùdi wàmba ne, tudi bònsò balela mu mpèkaatù, bafwimba mu bubì, balwè pa buloba twamba mashimi. Nènku Nzambi kàvwakù mwà kwangata muntu bwà kufwilaye

mukwàbo to, bwalu umwe mmupiile ànu mùdì mukwàbò amu. Mu Bwikadi bwà Nzambì, mwèpiskòpò udi mulela pa buloba apa ùvwa mupiile ànu mùvwà muyi wà mu binwìnù byà maalà mutàmbe kwikala wa ciipanshì mu cimenga emu. Muntu kèna mwà kufucila mukwàbò cibawu to.

<sup>32</sup> Ki bwà cinyì, Wàkangata mwoyi wà nyama wùvwà kawùyì mwenzè bubì, mwànà mukesè wa mùkòòkò. Nènku mu Dipungila Dikùlukulu, mikenji yìvwa ne, pàvwa muntu wènza mpèkaatù, ùvwa ùlwa ne mwànà wa mùkòòkò ku cyoshelu. Twámbe yéye mushipè dimwè dyà ku méyi matùma awu, ùvwa ulwa ne mwànà wa mùkòòkò ùmutèeka pa cyoshelu, ùvwa ùtenteka byanza byèndè pa mwànà wa mùkòòkò awu ne ùtonda mpèkaatù yèndè, wàmba ne ùvwa mwenzè bibì ne mumanyè ne mmupiile. Wa . . .ne ùvwa . . .Mikenji yìvwa yilòmba lufù. Nènku ùvwa ùtwàla mwànà wa mùkòòkò awu pa kaaba kèndè. Nènku pàvwàye . . .Muminu wà nyama mukesè awu wùvwa wùkòshiiibwa, ne yéye ùvwa ùbanga kusuba tukònò twèndè tukesè atu, ne ùdila mwadi. Ní ukààdiku mumòne pàdì mwànà wa mùkòòkò ùshipiibwa, mwadi kaayi wà wènza luse's wè! Kakwàcikwètù aku kàteeta bwà kudila mwadi, kàdì mujilu wàkù munène wà muminu awu wènda ùkòshiiibwa. Nènku pàdiku kàdisuba ne kàzakalala, ne pàdiku kàtandabala apu, pashìshe kàzakalala kàbìdì ne kàdila mwadi, ne mashi azòlòloka, àbolesha myòsà yàko mikesè ayi ne byanza byà mukuukwidi.

<sup>33</sup> Nènku pàdì mukuukwidi ùjingulula, mudiye mwenzè masandi, mùdiye mushimè, mùdiye mwìbè, cyònsò cìvwà dipiile dyèndè aci, anyi nànsha meeji mabi, cyònsò cìvwàku mu mundidimbì mutàmbe bukesè aci, ùvwa mupiile, bwalu cìvwa nngiikàdilù wèndè. Yéye ùvwa muntu mupiile, kabìyi pamwàpa ku dijinga dyèndè to, kàdì ku nngiikàdilù nkùvwàye mupiile. Ne yéye ùvwa ne cyà kujingulula ne mwànà wa mùkòòkò mukesè uvwa kàyi mwenzè bwalu ewu ùvwa mufwè pa kaaba kèndè yéyè. Nènku ùvwa ùmvwila kakwàcikwètù aku luse's.

<sup>34</sup> Kàdì muntu awu, ndekeelu wa byònsò pàvwà ànu mwànà wa mùkòòkò awu ùfwa, mucikàle ne mashi à mwànà wa mùkòòkò ewu pa byanza byèndè, ùvwa ùpàtuka mu nzùbu amu ne dijinga dimwèdimwè adi mu mwoyi wèndè, ùvwàye naadi ku cibangidilu adi. Bwà cinyì? Bwalu mwoyi wùvwà munda mwà mwànà wa mùkòòkò mukesè awu . . .Mwoyi wùdì wùsanganyiiibwa mu mashi. Mwoyi wèbè wùdì mu mashi èbè. Bwà aci's tudi bamanyè. Ne mwoyi wùvwà mu mashi a mwànà wa mùkòòkò wùvwà mwoyi wà nyama, ki bwà cinyì pàvwà tusùnsukilà twàwù tukesè tuingùtùdiiibwe ne mwoyi mupàtuke mu nyama awu apu, kawùvwa mwà kwalukila kùdì mukuukwidi to, bwalu mukuukwidi ùvwa muntu.

<sup>35</sup> Mashi àvwa àbwikila, kàdì kaàvwa mwà kufuta cibawu mu mùshindù mupwàngàne to; bwalu muntu ùvwa ùpàtuka

mu nzùbu amu, mwikàle ne dijinga dimwèdimwè dyà kwenza mpèkaatù adi, ànu mùvwàye naadi kumpàlampala amu. Kàdi, mu kwenza kwà cyôci eci, ùvwa mwindile cikondo cìvwà Mwânà wà mùkòòkò mupwàngàne mwà kulwa. Ne ùvwa ùcyènzela pa mulàmbù mwosha, bwalu ki mùshindù wùmwèpelè wùvwàye mumanyè pa bwalu abu.

<sup>36</sup> Pa nàнку, nudi numòna's, pàvwà mashi munkaci mwà kupòngoloka, ne mwoyi wùpàtuka mu nyama apu, kawùvwa mwà kwalukila kùdì muntu to; bwalu, ewu ùvwa nyama, ewu ùvwa muntu; nyama uvwa kàyi mwenzè bibi to, kùdì muntu mupiiile.

<sup>37</sup> Kàdi, kaa, dîngà ditùkù, kùkaadi bidimu bitwè ku binunu bibìdi, Mwânà wà mùkòòkò wà Nzambi wàkalediibwa mu cidiilu cikesè kampàndà cyà mu Betèlèhèmà, ne wàkalombodibwa bu mwânà wà mùkòòkò ku cishipeelu cyàwù. Kùkaadi bidimu bitwè ku cinunu ne nkàmà citèèmà, mu mappingaja emu, pa dîbà isàtù jaajaaja Yèyè wàkafwà. Nènku Mwânà wà mùkòòkò wà Nzambi uvwa kàyi katobà, kàyi kadyuwù mulebeleja ku nkùrusè ku Kàlvariyò wàkafwà bwà ngènzàmpèkàatù yònsò. Mpindyewu pàdì mukuukwidi ùlwa kùdì Mwânà wà mùkòòkò ewu, ku diitabuuja! Kàdi ewu m'Mwânà wà mùkòòkò wà mùshindù mushiilàngàne. Kí m'Mwânà wà mùkòòkò bu mukwàbò awu to.

<sup>38</sup> Muntu nànsha umwe kèna mwà kulwa kùdì Mwânà wà mùkòòkò ewu, pàdì Nzambi kàyi mumukòke dyàmbedi to. Nudi numòna budishikaminyi bwà Nzambi anyi? Kaa, ndi ntèkemena ne eci cidi cibwela too ne mu ndòndò mpindyewu. Tàngilààyi. Nzambi ùvwa mumanyè ne Yèyè ùvwa ne mìkòòkò pa buloba ebu. Ùvwa mumanyè ne neikalè ne bantu bàvwa ne cyà kusungidiibwa, ki dinanga Dyèndè kutàngiladi panshi e kumònadi aba bàvwa mwà kusungidiibwa abu; ki bwà cinyi, ku didyànjlila-kumanya, Yèyè wàkadyànjlila kulongolola Èkèleeziyà bwà kutwilanganayè Nendè dyamwàmwa, kàyi katobà anyi mufudi to. Nènku piikalàbi ne Nzambi mmulòmbe Èkèleeziyà wa kàyi katobà anyi mufudi, bìvwa bikèngela kwikalaYè ne cintu kampàndà bwà kumuvwija mùshindù awu. Yèyè kàvwa mufwànyine kucilòmba, Bwakàne Bwèndè, meeji Èndè kabìvwa bifwànyine kuMulekela ùlòmba cintu cyà bwena aci to bu ne kakùvwa mùshindù wà kucyènza.

<sup>39</sup> Ne muntu kèna mwà kudyènzelaçi yèyè mwinè to. Yèyè ùdi ànu dipangila dyètù dyà menemene edi. Nzambi wàkamulejilaci mu mikenji, mu balumbulwishi, ne mu Dipungila Dikùlukulu dijimà. Wàkatùma baprófetà, Wàkatùma bantu baakàne, ne bóbò kusangana ne muntu yònsò ùvwa ùpangila.

<sup>40</sup> Pa nàнку, Nzambi, ku ngàsà Wendè mudishikàmìne, kutùmaYè, kuumukila ku biibi byà Butùmbi, Mwân'Èndè umwèpelè mulela, bwà kwangataYe kaaba kèètù.



41 Vùlukàayi ne, bu Yèyè mwambè bwà paapà wa ku Loomò kukàngatayè, kàvwa mufwànyine kwikala mucyènzè to. Bu Yèyè mwambè bwà mwèpiskòpò mutàmbidile wa ku Canterbury kucyènzayè, awu kàvwa mufwànyine kwikala mucyènzè to. Bu Yèyè mubiikile taatù mutàmbe bunsantu wa kuneemekibwa anyi mwèpiskòpò wa buloba bujima, kàvwa mufwànyine kwikala mucyènzè to. Úvwa mufwànyine kwikala mubengiibwe ànu mwàkabèngiibwà Yudaàsà Mpongoloki amu. Kàvwa mufwànyine kucyènza to, bwalu úvwa “mulela mu mpèkaatù, mufwimba mu bubì, mulwè pa buloba mwikàle wàmba mashimi,” ne bimukèngela difuta dyà cibawu bwèndè yèyè mwinè.

42 Àlèluuyàh! Kàdi kwàkalwa Kampàndà ùmukila ku biibi byà mu Butùmbi; kàyi mungà muntu, kàyi muntu, kàyi muntu mwimpè, kàyi mwena Yuda anyi wa bàà Bisàmbà byà bèndè. Yèyè kàvwa mushàadile kùdi Nzambi wa Bukole bwònsò, musokòme mu mubidi wà buntu to nànsha kakesè. Wàkalwa, Yèyè mwinè, bwà kulàmbula Mashi Èndè Yèyè mwinè, bwalu kaAkavwila ku disangila dyà mulumè ne mukàji to. Disangila dyà mulumè ne mukàji kadivwa ne cyà dyanzamù to. Kàdi Yèyè wàkabwikila virgò kampàndà ne mundidimbi, ne kupàtula mu kabùlù kàà Mashi kàakafùkàYe, Yèyè mwinè, Uvwa kàyi mwenzè bwalu awu.

43 Dìbà adi lupàndu lwànyì, ne lwèbè, dilòlò edi, kì ndulààle ku makùmbanyina à byenzi byètù sungasunga to. Ndulààle ku ngàsà mulelèlè mudishikàmine wa Nzambi wa Bukolè bwònsò Udi mutùsungùle munda Mwèndè. Cyà bushùwà. Ncyènàku mufwànyine kwikala mupwàngàne, anyi wèwe kwèna mufwànyine kwikala mupwàngàne to. Ne katwèna twamba mutùdi bapwàngàne to. Kàdi tudi ne disàmbiibwa dimwèpelè edi, dyà ne, diitabuuja dyètù ndishindàmèène pa Mulàmbù mupwàngàne wùkaadi mumana kwitaba!

44 Dìbà adi mmunyi mutùdi tumanya ne tudi naaCi? Mpàdi mukuukwidi ùtenteka byanza byèndè, ku diitabuuja, pa mubidi wà Mukalenge Yesù, ne ùmvwa bwòwà bukolè bwà mpèkaatù, ne tuseku twà dimutwilà dyà matè mu mpàla Mwèndè Yèyè mwinè, ùmvwa mikèmù yà ku Getsèmànè, dikèngà dyà pa lufù dyà ku Kàlvaryò, ne ùmanya ne mmupiiile, ne ùtonda mpèkaatù yèndè mu mùshindù mujaalàme ne: “Èyi Mukalenge Mubènèshiiibwe, ndi mupiiile. Ne ncyènàku ne mùshindù mukwàbò to pa kuumusha Wèwè bwà kunkwàcisha. Nènku ku diitabuuja... Udi ulòmba, Nyumà Mwimpè, mmulwè ne ùndòmba bwà ndwe. Nènku mèmè mpindyewu, ku diitabuuja, ndi ngiitaba Yesù bu Musungidi wanyì sungasunga.” Mwoyi wàkafumà kùdiYe ku Kàlvaryò awu, wùdi wùbiiikidiibwa ne Nyumà Mwimpè awu, wùvwà musokoka mu kabùlù kàà Mashi kàà Mukalenge Yesù awu, wùdi wàlukila pa mukuukwidi ne wùmubàtiiza ne Nyumà Mwimpè, wùmubweja mu Mubidi wà Kilistò.

45 Ne Yèyè ùkaadi mumana kulumbulwisha. Kabyèna bikèngela bwà ùditàcishè bwà cilumbulwidi to. Mùndi nkùdimuka ntàngila kankùrusè kakesè kàka, ndi njingulula ne kòkò aku nkàdi . . . kàleejà mubidi Wèndè. Nènku mpindyewu mubidi awu wùkaadi mumana kulumbulwisha. Nzambi kèna mwà kuwùlumbulwisha cyàkàbìdì mu bwakàne to, bwalu mmumana kulumbulwisha. Nzambi wàkatuuta manyooka à lufù pa mubidi awu. Nènku pàncìdì ànu mwà kupeta mùshindù wa kwikala musokoka mu mubidi awu, Dinyooka Dyèndè dyàkatuuta bwànyi mèmè ne bwèbè wèwè. Tudi badishikàmìne! Loomò 8.1, mmwambè ne: “Ki bwà cinyi kakwèna mpindyewu dipiila kùdì aba bàdì mu Kilistò Yesù to, bàdì kabàyi bènda bilondèshile mubidi, kàdi bilondèshile Nyumà.” Ki bwalu mbwòbù abu’s, kakùyì dipiila to! Cyàswà kwenzeka cyènzekè, wèwè udi musokoka mwinshì mwà Mashi.

46 Kàbìdì, mmunyi mutùdì tubwela mu Mubidi awu? Kolinto wà Kumpàla 12.13, ùdi wàmba ne: “Ku Nyumà umwe!” Nyumà ùdi ùlwa bìshi? Ku Mulàmbù awu. Nyumà ùvwa ùsanganyibwa penyi? Munda mwà Mashi. Wa nyama kàvwa mwà kwalukila bwà cinyi? Ùvwa nnyama. Nyumà wa nyama kàvwa mwà kulwa kùdì nyumà wa muntu ne kumwenzela cintu nànsha cìmwè to, bwalu nyumà wa muntu ùvwa wa mu mulongo mutùmbùke kutàmba wa mwoyi wà nyama. Kàdi nyumà wa muntu mukwàbò nànsha yèyè nganyi kàvwakù mufwànyine kwalukila to. Wèwè ne nyumà wà nkambwà kampànda, aci’s nditèndeleele dyà bakishi. Kàdi Nzambi Yèyè mwinè ngwàkalwa, bwa Nyumà Wèndè Sungasunga, udi wa mu mulongo mutàmbe kutùmbuka wa nyumà udikù awu, àmonè mwà kwalukila mu mmwènekelu wa dibàtiiza dyà Nyumà Mwîmpè, kùdì mukuukwidi awu, ku Mashi à Kilistò, ne àmubwejè mu Mubidi awu. Yèyè mmukùbìbwe!

47 Tàngilààyì. Mashi a bimpàngà byà ngombe ne à mbùji kaàvwakù mafwànyine kukùmbana to, bu mudìbi ne ôwò àvwa matekète. Mpindyewu tùbangilààyì kubala, lwà ku mvensà wa 12. Èyo. Mashi à bimpàngà byà ngombe ne mbùji kaàvwakù mafwànyine kukùmbana to, anyi kaàvwakù mafwànyine kufuta cibawu to. Tàngilààyì.

*Kàdi ewu muntu yèyè, (Muntu kaayi? Mwèpiskòpò anyi? To. Paapà anyi? To.) . . .*

*Kàdi ewu muntu yèyè, paanyimà pàà yèyè . . . mumane kulàmbula mulàmbù wumwèpelè bwà mpèkaatù bwà kashidi, wàkasòmba ku dyàbalùmè dyà Nzambi;*

*Kubangila apa mmwindile too ne pàvwijibwà beena lukunà bèndè citèèkedi cyà makàsà èndè.*

48 Nudi badilongòlòle anyi? Nudi badilongòlòle bwà Dìyì anyi? Tèèlejààyaaku Eci, dîbà adi ndi muswè nùCìpwekèshè. Tèèlejààyi ne ntèmà.

*Bwalu ku mulàmbù wùmwèpelè* (kí nku cidimu ku cidimu to, kí nku ditàbuluja ne ku ditàbuluja to, kí nku disangisha ne ku disangisha to, kí nku ditùkù ne ku ditùkù to) . . .

*Kàdi ku mulàmbù wùmwèpelè yêyè* m-m-u-p-w-à-n-g-à-j-e (bôbò anyì? Yêyè!) . . .

*. . .ku mulàmbù wùmwèpelè yêyè mmupwàngàje* (aci ki dilòmbà dyà Nzambì) *bwà kashidi aba bàdi bajidiibwe.*

<sup>49</sup> Ki bwalu mbwôbù abu's. Ki dyandamuna ndyôdì adi ku lufù lwà Kilistò. Ki dyandamuna ku Kàlvariyo ndyôdì adi. Kakùyì mpatà to Yêyè, ne Mashi Èndè Sungasunga, wàkafuta mushinga wà mpèkaatù yetù, ne kupwàngàja bwà kashidi, beena kwitabuuja Bèndè. Ki bwà cinyì, mu Kilistò tudi biimàne katùyì ne kadyuwù to, bapwàngàja mu Bwikadi bwà Nzambì wa Bukolè bwònsò. Tudi bantu badishiya paanyimà, ne malongesha ètù sungasunga; tuvwa bônso balongeshiibwe ne bikèngela túbandè too ne pa mwaba kampàndà, bikèngela twènzè cintu kampànda. To, mwanèètù, kí ncintu kampàndà cyúdi wèwè mwenzè to; ncidi Nzambì mukwenzèle wèwè! Tudi mpindyewu, piikalàbi ne tudi babingishiibwe ku diitabuuja, tudi bapwàngàja bwà kashidi mu Bwikadi bwà Nzambì.

<sup>50</sup> Pashiishe Yesù wàkamba ne: “Ki bwà cinyì ikàlaayi bapwàngàne.” Dìbà adi, nkupwàngàjiibwa bwà kashidi. Nzambì, ku lufù lwà Kilistò, kùkaadi bidimu cinunu ne nkàmà citèemà, leelù ewu, mupwàngàje mwena kwitabuuja, wàkadyànjlàYe kumòna kumpàlà kwà difùkà dyà dyulu ne buloba, bwà kashidi. Ne aba bàdiYe mubiikile, mMubàbingishe. “Aba bàakadyànjlàYe kumanya, mMubàbiikile; aba bàdiYe mubiikile, mMubàbingishe; aba bàdiYe mubingishe, Ùkaadi mumanè kubàtùmbisha.” Ùkaadi mupwàngàje beena kwitabuuja Bèndè!

<sup>51</sup> Mpindyewu tàngilàayi, twàlukilàayaaku mpindyewu ku mvensà wa kumpàla.

*. . .mikenji bu mùvwàyi ne mundidimbì wà bintu bimpè bicivwà bilwa, kàdi kayiyi cimfwànyì ciinè cyà bintu abi to, kayèenakù ku milàmbù yivwà yifidiibwà ku cidimu ku cidimu misangu ne misangu ayi mwà kuvwija uvwa ulwa awu mupwàngàne to.*

<sup>52</sup> Tàngilàayi “mupwàngàne,” ki citùdi twamba.

*Bwalu dìbà adi kabivwa bikèngela bwà kwikalabò balekèle kuyifila? bwalu mukuukwidi pàkaadiye mumàne kukezudiibwa kàvwakù mufwànyine kàbidi kwikala ne civùlukilu cyà mpèkaatù to.*

<sup>53</sup> Udi uswa kwamba cinyì? Mwakù ewu *civùlukilu* mwaba awu, ne dyumvwija, dijaalàme didi ne “dijinga.” Nènku muntu

yêyè mulwè, mukuukwidi, mu mùshindù mujaalàme, kumpàlà kwà Kilistò, ùmòna dikenga Dyendè, ne ùdilàmbula yêyè mwinè kùdi Kilistò, ne wàmba ne: “Èyì Mukalenge Nzambì, kakwèna cintu nànsha cìmwè mu mèmè emu cìdi mwà kufuta cibawu to, kàdi ndi mèmè yònsò muKweyèmène Wèwè,” dībà adi Nyumà Mwimpè awu ùdi ùbwela mu mwoyi wà buntu awu, cilumbù ciinè cyà mpèkaatù aci cyumba cikòshiibwa bwà kashidi, bwalu dijinga dyònsò dyà mpèkaatù dyàmanyi kuumushiibwa kùdi. Bwalu bu mikenji mwà kwikala micyènzè, nùnkù yòyi milàmbù ayi kayìvwa mwà kwimanyikiibwa to; kàdi bu mùdibi ne kabìvwa mwà kucyènza to, byàkakèngela bwà Kilistò àfwe, bwà kutuvwija bapwàngàne.

<sup>54</sup> Balundà bàànyì, kùdi bintu búngì cyaààà bitùdi bafwànyine kwamba dilòlò edi, pa bupwàngàne. Tutu tuteeta misangu yònsò ànu bwà kutonkona mèsù à muntu mukwàbo kampàndà, bwà kudìvwija twètù biinè batàmbe cijila ndambù kupìta mùdìbo—mùdìbo bóbò’s. Kàdi bu twètù ànu mwà kutàngila cimfwànyì, cìdi ànu ngàsà wa Nzambì udi wenza ne twikalè citùdi eci.

<sup>55</sup> Mùneemu emu musangu kampànda, mu Ohio emu, ngàkàyiila dilesònà mu mushindu mukolè. Mvwa ngenza disangisha mu Ohio, ne mvwa musòmbèle ku ncyààmà. Bwà búngì bwà bantu, ncìvwa mwà kushààla mu cimengà to.

<sup>56</sup> Tuvwa tudìila ku nzùbu mukèsè wa cidìilu wa Dunkard. Ne bàna bàà bakàji batekète bafidì bàà byàkudyà byà mu nzùbu wa cidìilù balenga bàà dikèma, ne bavwàle mvwàdilu wa kaneemu, bakezùke ne mwàbò mwònsò, bainàbànzà bàà bukàlàngà, mbàvwà bàtùpèèsha byàkudyà. Kàvwa nkaaba kakesè kàà mu dyulu, bwà kudìila mu mwaba bu nànkù. Cìkukù cyàbò cìvwa cyà mankendà a menemene. Kàdi mu dyàlumingù bàvwa bàkànga bàya mu èkèleeziyà wabò. Mvwa ne nzala ndambù, mvwa ne cyà kuyiisha mu dyàlumingù mu mapingaja.

<sup>57</sup> Ki mèmè kuya ku kazùbù kakesè kàà ciibidilu...ànu kazùbù kakesè kàà ciibidilu kèètù kàà cyena Àmèrikè aka, bwà kupetakù cintu kampàndà cyà kudyà. Kàdi pàngààbwedì mu ciibi, cìngùmvù ncìnyì’s ànu màshìnyì a binjànjà byà mfrangà àdila! Ne muntu mulùme wa bukòlè bwànyì ebu mwimàne mwaba awu, uvwa mîngà misangu musèlàngàne, ne dibòkò dyela mukàji kampàndà kunshìngù, ùtwa mubèlà wà mfrangà. Muleeji wa mpàla wa mikenji yetù, mukùbi wa bwakànè bwètù, wa bintu byètù mwinè, nyawù ùvwa mwaba awu munkaci mwà kunyangakaja cintu mene cìvwaye ne cyà kukùba’s. Bwalu, kutwà kwà kartà kàà mfrangà mu Ohio nkukàndika kùdi mikenji, ne kutwà kwà mubèlà wà mfrangà.

<sup>58</sup> Ki mèmè kukùdimuka e kutàngila lwà mundekeelu mwà nzùbu amu, mùvwa musùmbà wà nsongààlùmè yà bitende, ne misambu yà kale yà bidùndadùndà mu cìsanji, munkaci

mwà kwimba. Nsongààkàji wa bidimu bitwè ku dikùmi ne mwandamukùlù, mwikàle ne mankendà ònsò mu mubidi wèndè yèyè bu mukàji. Kàdi ùvwa mwimàne mwaba awu ne nkanzu wèndè mulembeleja lwà kumpàla eku, ne umwe wa ku nsongàalùmè ayi mwikàle ne byanza bitenteka nsongààkàji awu, mwaba wùvwà kawùyi mubikùmbànyine to. Nènku bàvwa munkaci mwà kunwà mfwankà ne kunwà maalà.

Ki mèmè kudyàmbidila mundamunda ne: “Éyi Nzambi wà yààya, mmunyi mŪdì mwà kucitwàla’s?”

<sup>59</sup> Ki mèmè è kutàngila ku dyàbalùmè kwànyi, pàngàakuumvwà muntu kampàndà ùtwa mukèmù mukolè. Nènku ki mukàji mukùlumpè ewu musòmbe mwaba awu, pàmwàpa wa bidimu makùmi àsambòmbò, anyi makùmi mwandamutekète. Úvwa muvwàle tulàmbà tukesè twà kale twà ciipanshì atu, tushìikidile ànu lwà kuulu kwà bibelu eku, ne mubidi wèndè mukùlākàji mwelè minyèngù mukwàte ne byà luse awu mwikàle ànu mufwatàlale ne mwàwù mwònsò. Ne ùvwa ne kàpèntà pa mushikù apa, ne cintu cinène menemene cikùnzùbile ku luseke lwà mpàla eku, cilaaba; muvwàle tusàbààtà tukesè, tuusàndalà, ne nzàdi yà ku makàsà mikùnzùbile, milaaba inè; nzàdi yà ku byanza mikùnzùbile, milaaba inè. Ne nsuki yèndè yivwa mikòsa mìpi menemene, myenza mvwàngalà, myela bleu. Ki mèmè kumutàngila.

<sup>60</sup> Ne dyàmwàmwà dyà mèèsà kùvwa bantu balùmè bàbìdì basòmbekù, bakwàcike. Umwe wa kùdìbo (mùvwa mu muvù wà luuyà) muvwàle cinkooci cyà kale cyà bàsàlaayi, mudijìngile citàmbalà cifiike mu nshìngù, ne myedi kwìsù kwònsò eku, ùbyola ne ùtùngunuka nànkù awu. Ki kulòmbabò dilekela, bantu balùmè abu’s, bàlòmba mukàji awu, e kubangabò kupàtuka mùshindù ewu, batàngile ku nkumba.

<sup>61</sup> Mèmè kushààla mwimàne mwaba awu. Ki mèmè ne: “Nzambi, bwà cinyi Kwènàku ubùtula cintu cyònsò eci mu kaabujimà? Bwà cinyi Kùyikù ucìinyija mwinshì mwà buloba?” Mèmè ne: “Nebikengelè bwà Sarah wanyì mutekète ewu ne Rebekah bàkolelè mu cintu cyà mùshindù wàwa anyi?” Mèmè ne: “Mmunyi mùdiku Wèwè, Nzambi, mu cijila Cyèbè cinène, mwà kutwàla bwà kutàngila cintu bu nànkù awu, kàdi kubènga kutùma dikanka dyà buloba bwà kucìinyija mu buloba?”

<sup>62</sup> Nènku pàmvwà mwimàne mwaba awu, mpiisha mukàji awu, mùmvwà mmupiiisha amu, ki mèmè kuya paanyimà pàà ciibi. Mèmè kuumvwa Nyumà wa Nzambi ùlwa kùndì, ki mèmè kuya paanyimà pàà ciibi apu.

<sup>63</sup> Ki mèmè kumòna bu cintu bu mvùnda. Ne pàvwàci nànkù apu, mu cikèènà-kumòna, bùvwa mbuloba munkaci mwà kunyùngùlùka. Nènku pàngàmònu apu, ku nyùngululukilu wa buloba kùvwa mukàbà mukùnze, ku nyùngululukilu wa buloba aku. Nènku pàngààfikì ku buloba abu, mèmè kudimòna mèmè

mwinè, mwikàle ànu mwánà mukesè, mwikàle ngenza bintu bivwà kabiyi bikumbàne mémè kwenza to; pámwápa kabiyi bya *nànkú* to, kàdi cívwa mmpèkaatù. Nènku musangu wónsò wúmvwà ngenza cintu kanà cyónsò, mvwa mmòna mundidimbì mufiike awu wùya mutàngile mu Dyulu. Wa bwalu, Nzambi úvwa mufwànyine kwikala munshebèye ànu pa cibànzà's.

<sup>64</sup> Pashiishè mémè kumòna pankaci pàànyì ne Nzambi apu, piimàne Mulàmbù mupwàngàne awu. Mémè kuMumòna Yèyè mwimàne mwaba awu ne mèbà ku mutù, ne makòdi maMulembèlèle kwisù. Ne musangu wónsò wúvwà mpèkaatù yànyì yìbanga kuya mitàngile kùdi Nzambi, Yèyè úvwa wòlola cyanza úyìkwàta, bu mùtù cipumbishi ku kàshinyì amu. Yèyè uvwa unkuba ku lufù. Nènku musangu kanà wónsò wúmvwà ngenzà cintu kampàndà cibi, Nzambi úvwa mufwànyine kwikala munshebèye. Ncyà bushùwà ne, ncìdi cijila Cyèndè cilòmba. Ncìdi mikenji Yèndè yìlòmba. Ne musangu wónsò wúndì ngenza cintu kanà cyónsò, anyì wèwè wenza cintu kanà cyónsò, Mashi à Yesù Kilistò àdi ènza bu cikàndiki. Ki mémè kumòna ne mukàbà mukúnze awu wúvwa wúmvwija cyòci aci, dîba adi, cyà ne Mashi àcìdi ànu makwàte buloba.

<sup>65</sup> Nènku pámvwà mwimàne, mutàngile apu, mémè kusemena pabwipi Nendè ndambù pámvwà muMutàngile apu. Nènku mémè kuMuumvwa wàmbà ne: “Taatu, mufwilèku luse, kî mmumanyè cidiye wenza aci to.” Ki mémè e kutàngila pànshi, pàvwa patèeka mukandà kampànda. Ne kúvwa Mwanjèlo mufúndi wa maalu mwaba awu, mwimàne ku luseke Lwèndè aku. Nènku musangu wónsò wúmvwà ngenza mpèkaatù, yìvwa yìfúndiibwa mu mukandà awu. Ne dínà dyànyì divwapù. Ki mémè kujingulula ne dîngà ditùkù, mémè. . . mukàbà wà Mashi awu newumushiibwè ne nengikàle ne cya kwimana mu Bwikadi bwà Nzambi, ne mwoyi wànyì mubiipe ewu. Kàdi, mémè kumòna ne, ku Luse Lwèndè Yèyè úvwa windija dilumbulwishiibwa dyànyì.

<sup>66</sup> Mémè kuya kùdiYe, ne didipwekesha dyónsò. Mémè kutwà binù, e kwamba ne: “Éyi Yesù, Wèwè Mwánà wa Nzambi, ncyèna mukumbànyine bwà kulwa mu Bwikadi Bwèbè to. Kàdi Udikù mwà kuswà bwà kumfwila luse bwà bìndi mwenzè abi anyì?”

<sup>67</sup> KulengaYè luseke Lwèndè ne cyanza Cyèndè, kwangata mukandà wà kale awu e kufúnda pamutu apu ne “mufwidìibwe luse,” kuwimansha paanyimà Pèndè apu, ne mpèkaatù yànyì kuyayi! Pashiishè Yèyè kuntàngila, ne dísu dyumisha mu mpàla, KwambaYè ne: “Mpindyewu Mémè's ngàakufwidì wèwè luse, kàdi wèwè udi muswè kumupiiisha yèyè.” Pashiishe mémè kumòna cívwàci cyúmvwija.

<sup>68</sup> Ndi mwenzè ànu mpàtuka mu cikèènà-kumòna aci, mémè kuya kùdi mukàji awu. Mémè ne: “Wetwàwu!”

69 Ûvwa ùnwa maalà. Kwambululayè mèsù kuntàngila, e kwambayè ne: “Kaa, wetwàwu.”

Mémè ne: “Ndikù mwà kusòmbela panshì anyi?”

Yèyè ne: “Ndi ne muntu’s.”

70 Mémè ne: “Ncyèna nswà kucyàmba mu awu mùshindù to, inàbànzà. Ndi njinga ànu kuyiikilakù neebè, bwà katanci kakesè.”

Yèyè ne: “Sòmbaaku.”

71 Ki mémè ne: “Inàbànzà, ànu mu tusunsa tukesè emu, pâmvwà mwimàne paanyimà pàà ciibi cyàcyà...” Mémè kubanga kumulondela. Nènku pângàabangi kutàngila, binsònji kubangabi kumupwekela pa matàma. Ki kungambilayè... Mémè ne: “Inàbànzà, kwèna ne meeji a kwenza bintu ebi to. Yesù wàkafwà, ne manyooka a Nzambì mmindija kùdi Mashi Èndè. Kwèna ne meeji a kwenza cyôci eci to.”

72 Ki yèyè ne: “To, mukalenge.” Yèyè ne: “Tààtù ùvwa mulami mu èkèleeziyà. Mvwa mukolèle mu dikù dyà beena Kilistò. Mémè ne bàyaanyi tuvwa bidimba byà èkèleeziyà byàkatwàdijà, ne tuvwa ne nsòmbelu wa bwena Kilistò.” Kubangayè kundondela, paanyimà pàà lufù lwà bàyèndè... Ûvwa ne bânà bàà bakàji batekètè bàbìdì, ki kupàmbukayè. Ne mwàkamushiyà bânà bèndè bàà bakàji abu, ne mwàkanyampàye nsòmbelu wèndè. Nènku ùvwa ùdyàmbidila ne kakùcivwa kàbìdì ditèkemena bwèndè yèyè to.

73 Kàdi mémè kwamba ne: “Nzambì, ikàlàku ne luse! ‘Aba bàdìYe mudyànjile kumanya, mMubàbìikile.’”

Yèyè ne: “Wèwè ki Révérend Branham, wa kwinsì kwaka awu anyi?”

Mémè ne: “Mmémè.”

74 Yèyè ne: “Ndi ndyùmvwa mémè mwinè bundù, bwà kwikala musòmbè kaaba aka mùshindù ewu.” Yèyè ne: “Udi wela meeji ne nkufwànyinekù kwikala mpungà bwànyì mémè anyi?”

75 Mémè ne: “Yesù udi ne mabòkò Èndè moolola, mwindile bwà wèwè kulwa, inàbànzà.” Ki bantu bakwàbo kubangabò kujuuka. Ki mémè kwamba ne: “Udikù mwà kupàtukila naanyì kùneeku panshi apa anyi?”

Yèyè ne: “Ndi muswè, mukalenge.”

76 Mémè kumukwàtà ku cyanza. Mémè kwamba ne: “Wèwè udi bu wa bukolè bùmwè ne mamwànyì. Udikù mwà kutwà naanyì binù kaaba aka, panshì apa anyi?” Nènku mwaba awu panshì apu, twàkanyangakaja mwaba awu mu mapingaja amu, kuwùvwija disangisha dyà cyena-kale. Nènku Nzambì wàkasungila mukàji awu, ku ngàsà Wèndè. Wàkavwàla bilàmbà e kulwayè mu disangisha, ne, bwà ku dyanyì dimanya, ùdì ne nsòmbelu wà bwena Kilistò dilòlò edi.

<sup>77</sup> Ncinyi aci? Kaa, Nzambi ùdi ùlòmba bupwàngàne! Ùdi ùlòmba kanyinganyinga kèèbè. Ùdi ùlòmba lulamatu lwèbè kùdiYè. Kadi Ùdi ùkèba dilòòlò edi. Nànsha wèwè mwenze mpèkaatù bungi bìshi, yikalè mikesè anyi yàbungi bìshi, wèwè uci di ànu ngenzàmpèkaatù, ne kwènàku mwà kubwela mu mungà mùshindù to ànu ku Yesù Kilstò, Mulàmbù wà Nzambi wùdi mukumbàne mu byònsò. Ne mu Yèyè udi mupwàngaja bwà kashidi. Elàâyibi meeji pa bwalu abu! Kí ncintu kampàndà cyúdi wenza to. Kí mmabèji mapyamàpyà aùdi ubuulula to. Kí nsòmbelu mupyalùpyà ùdi utwàdija to. Nditonda dyà bubi bwèbè, ne ngàsà wà Nzambi kùdi. Aci cidi cikufikisha ku bupwàngàne, ne pashiishè udi mupwàngàja mu Yesù Kilstò.

<sup>78</sup> Ndi mutwishìbwe, dilòòlò edi, mulundà wanyi, patùcidi kaaba aka pa díbà dyà bwalu butondè edi mpindyewu apa, didi mapàngadika ne cyà kwangaciibwa paanyimà pàà bàmanè kutèèleja bwalu-bulonda ebu. Udi mufwànyine kwikala kacya kùyikù mwanji kubùumvwa kwònsò eku to. Kàdi kwèna mwà kupàtuka ku cimwè cyà ku biibi byàbya mwikàle muntu wa mwomùmwe mùvwà mubwelè amu to, udi ne cyà kupàtuka mutàmbe kulengela anyi mutàmbe kubìpa.

<sup>79</sup> Nèku patùdi twinyika mitù yètù ànu bwà katanci kakesè cyanààna apa, ndi muswè bwà wèlè meeji bikolè pa bwalu abu. Kàdi bìshi bwà musùkà wèbè awu dilòòlò edi? Yesù Kilstò wàkakufwila.

<sup>80</sup> Wèwè udi wamba ne: “Mwanètù Branham, pàndi mwà kulekela dinwà dyà mfwankà, pàndi mwà kulekela dinwà dyà maalà, pàndi mwà kulongolola cintu eci, nencyènzè.” Kaa, kacyakwenjiibwakù bimpè to. Kwakupetakù mùshindù wà kucyènta to. Bwà cinyi kùyi ulwa ànu mùshindù wùdi awu? Nèku, ku diitabuuja, ndààku ku Musùlù awu, wùdi mpùtá Yèbè yidi yizòloloka ayi yipàtula, pashiishe dinanga dipikudi diikalè Cyèbè cyena-bwalu, ne neciikalè nàku too ne muwàfwà.

<sup>81</sup> Bwà cinyi kwangata mupinganyi? Bwà cinyi kuteeta bwà kubwelela ku èkèleeziyà webè? Bwà cinyi kuteeta kubwela ne bwalu wàlekèdi dinwà dyà maalà anyi wàlekèdi kushima? Lwàku mwikàle ulonda njila wa bupwàngàne! “Bwalu, ku Mulàmbù wùmwepelè, Yèyè mmupwàngàje bwà kashidi aba bàdi bajidiibwe.”

“Ndi ndwa mujidiibwe mùnyi?”

<sup>82</sup> Tondà mpèkaatù yèbè mu Bwikadi bwà Mashì à Yesù; ne Mwoyi wàkapàtukà mu Mashì awu awu, wùdi wàlukila pa mukuukwidi, ne wùmujidila wùmuumusha ku majinga à bintu byà pa buloba. Bwalu, ku Mulàmbù mukumbàne mu byònsò awu, nkùdiYè mutùjidile; ku Nyumà umwe, tudi bònsò babàtìijìibwe mu Mubidi wùmwe. “Mpindyewu kakwèna dipiilà kùdi aba bàdi mu Kilstò Yesù to, kùdi aba bàdi kabàyi bènda bilondèshile mubidi, kàdi bilondèshile Nyumà.” Wèwè



uteeta kwenda bilondèshile Nyumà, kàdi mucíkàle walakana bintu byà mubidi, Mulàmbù awu kí mmuteèkùibwe bikùmbàne menemene kùdì wêwè to. Kàdi mukuukwidi pàkaadiye mumàne kukezudiibwa, kàcyèna kàbìdì ne dijinga dyà mpèkaatù to.

<sup>83</sup> Kì civwà Kàlvariyò ncyaci. Kí mmwaba wà kupàanyina bilòngò, anyì mwaba mukèsè wà kwenzela *bikampànda* anyi *bikansanga* to. Mmwaba wùvwà Nzambi ne muntu bapungìshilàngàne. Mmwaba wàkatwàdiibwà ditalala ne dikùbiibwa dipwàngàne kùdì bukwàbantu. Udikù mwà kuya pàmwè nàanyi, dilòlò edi, ku Kàlvariyò, wêwè mulundà wanyì ngènzàmpèkaatù, ne ku diitabuuja kulaabà Mashi aa ku musùukà wèbè sungasunga, ne kulekela Nyumà Mwímpè àlwe ne àkujidilè ku Mulàmbù Wèndè munène awu anyi?

<sup>84</sup> Kumpàlà kwà twétù kusambila, udikù mwà kwela cyanza muulu kùdì Nzambi, ne kwamba ne: “Mfwilèku luse, Nzambi. Nyewù ntonda mpèkaatù yànyì yònsò mpindyewu, mu dilòlò dyà Diitànù Dinsantu edi. Ne ndi ngaanyisha dikènga dinène dyàkankèngelà Kilistò adi. Ndi mpindyewu ndekelela diswa dyànyì sungasunga, twipàcilà twànyì sungasunga ne byònsò, bwà kuKulonda Wèwè kubangila ànu ku ditùkù edi, kubangila ku mpindyewu.” Udikù mwà kwela cyanza muulu, wamba ne: “Wamvùlukakù, mu disambila, Mwanèètù Branham. Aci ki dipàngadika dyà mwoyi wànyì?” anyi? Kùdikù muntu, mu dilòlò dinène edi, patùcidì bindile katanci kakesè cyanààna apa anyi? Lwà ku dyàbalùmè dyànyì eku, ncyà bushùwà ne kùdì muntu lwà kuntu kwàka. Udi udyùmva bundù bwà mpèkaatù yèbè anyi? Udi udyùmva bundù bwà byùdì mwenzè anyi?

<sup>85</sup> Bàà pa buloba dilòlò edi bàdì bàkèba bilòbò. Kàdi bàdì ne bilòbò, bwà mu mubidi ewu.

<sup>86</sup> Dìngà ditùkù mu Suisse mwàmwa, pàvwà Suisse wa beena Suisse mwikàle mu njìwù, kasùmbù kakesè kàà beena Suisse kàvwa kadisangishe mu mpàta, bwà kukùbabò–kukùbabò bubanji bwàbò. Cilwilu civwà cilwa civwa cinène cibàtàmbe bòbò; bàvwa bònsò balongèshìibwe mvità, bàvwa ne mafùmà manène ne ngabu. Beena Suisse kabàvwa ne cyà dyaenza to ànu kulekela mvità. Bàvwa bacìncimikila ku mukùna. Dìbà adi cilòbò kampànda kupàtukaci. Bìvwa bikèngela bwà muntu kampànda kufwàye. Nènku bu bòbò mwà kucìmunyibwa mu mvità ayi. . .

<sup>87</sup> Kabàvwàkù ne cintu to ànu kùpàkupà ya kale misàkisha, ne mabwe, mici, byà kulwangana naabì. Piinè apu, mpàvwà cilwilu civwà cilwa aci cimwèke bu cimanu cyà màdyòtò. Bu bòbò bakwàciibwe, nùnkù mbalààla ne bakàjì bààbò balenga batekète abu ku bukolè, balààle ne bânà bààbò bàà bakàjì batekète balela abu ku bukolè, nùnkù bânà bààbò bàà mu mabòko mbashipiibwe, mitù yàbo mitaayìshìibwe, mbànza yàbò mibùtùdiibwe, bintu byònsò bijimine.

<sup>88</sup> Dìbà adi kùvwa muntu kampàndà, mwena dìnà dikaadìbo bapwà mwoyi ne lùkàsà lutàmbe, dyèndè ùvwa Arnold von Winkelried. Kupàtukayè, e kwamba ne: “Nwènù beena Suisse, leelù wa baaleelù mèmè ndi mfla mwoyi wànyì bwà Suisse.” Kwambayè ne: “Lwà paanyimà pàà mukùna pààpa pàdi kazùbù kakesè katòkè. Ndi ne mukàji ne bânà bàsàtù bangindìle. Kàdi kabààkummònakù kàbìdì to, bwalu, leelù wa baaleelù mèmè ndi mfla mwoyi wànyì bwà Suisse.”

Bòbò kwamba ne: “Ciwènzà ncinyì, wèwè Arnold von Winkelried?”

<sup>89</sup> Kwambayè ne: “Ndonrààyi, ne nwènzè cyònsò cinùdìku pèènú mwà kwenza ne cìdì cìnùkengèlà kwenza naaci aci.”

<sup>90</sup> Ki kutàngilayè kùvwa cilwilu aci aku too ne mwàkajandulayè mwaba wùvwa mupimbu wà mafùmà mutàmbe ònsò awu. Dìbà adi kwelayè byanza muulu, kuvùkuta lubilu mutàngìle mu cimanu cinènè cyà madyòtò àà mafùmà awu, kushiya lubilà lukolè ne: “Shiilaayi budishikaminyi njilee! Shiilaayi budishikaminyi njilee!” Mafùmà lukàmà kukùdimuka bwà kumucimpikawù; kubaalulayè mabòkò e kuàkungujilayè mu cyàdi cyèndè, òwò kumushindikila panshì, e kufwilayè ku nsongo yà mafùmà awu. Beena Suisse abu kumulondabò ne tubwengà ne micì. Dileeja dinènè dyà bulòbo adi ki kutangalajàdi cilwilu aci bayè bimpàmbàmba, mu mùshindù wà ne Beena Suisse bààkabàpa mutuutu kàdi kubìipatabò mu buloba abu. Nènku kacya kabàtukù banji kupeta kàbìdì mvità to kuumukila ànu ku ditùkù adi, kacya ànu apu.

<sup>91</sup> Wèwè mwimàne mu Suisse ne mutèèle dìnà dyà Arnold von Winkelried, nèumonè mùdi binsònji bibàpwekela pa matàma. Mbwa cinyi? Yèyè ngwàkasungila buloba bwàbò. Aci's cìvwa cyenzi cinènè cyà bulòbò. Mpùùkàpùùkà bwà kucipàlakajabù ne cikwàbò, ne kacya kakùtukù cìdì cìcìtàmbe to, pa buloba apa.

<sup>92</sup> Kàdi, kaa, s'kàvwa nkaacintu kakesè ku cyàkenzekà ditùkù kampànda! Pààkiimanà cisà cyà Adàmà, badémòns bàbwela bàfùmìna nseke yònsò, baprófètà bapangìle, mikenji mipangìle, mulàmbù wà ngombe ne wà bàna bàà mìkòòkò mipangìle, ngiikàdìlù wa muntu mupangìle, bintu byònsò. Ki cisà cikesè cyà Adàmà kwimanaci, cìcìmùnyìibwe; bacitàmbe ku búngì kùdì badémòns, miitabuuja a màjìmbù, màsaamà, mabèèdi. Kùvwa Kampànda mupàtùke mu Dyulu, e kwamba ne: “Ditùku edi Nèmfwilè cisà cyà Adàmà.” KulwaYè pa buloba ne kuvwijiibwa mubidi. KutàngìlaYè buludì panshì munkacì mwà mafùmà mùvwa mutàmbe kwikala mìdimà amu. Cyà citàmbe kwikala cyà mìdimà cyà ku byònsò bìvwa bìkwàcishà muntu bwòwà cìvwa ndufù, kàdi Yèyè kukòngolòjila lufù mu cyàdi Cyèndè. Nènku ku Kàlvaryò Yèyè kufuta mulàmbù, e kwela lubilà lukole ne: “Shiilaayi Budishikaminyi njila!”

93 Ne Yèyè ùdi wèla lubilà lukolè kùdi Èkèleeziyà Wendè ne: “Angàtaayi CìNdì munùshùile eci, Mashi Àànyì ne Nyumà Wanyì, ne lwàngànaayi mvità ne cyònsò cinùdiku naaci aci.” Tudi mwà kucimuna dilòlò edi, ku Cyôci aci, mulundà wanyì. Udi mwà kwipata dyabùlù kule neebè. Mwena lukunà yònsò wa kale udi mu nsòmbelu webè awu, ùdi mwà kwipaciibwa kùdi Mashi ne Nyumà wa Kilistò, ne udi mwà kwimana mupwàngàne mu Bwikadi Bwèndè. Kilistò wàkasebela njila!

94 Udikù mwà kubàndisha anu dibòkò dyèbè adi cyanàana kudiYè, kwamba ne: “Ùmfwilèku luse” anyi? Nzambi àkubènèshè, mwanèètù wa balùme. Mukwàbò muntu wa ne: “Ikàlàku naanyi luse, Nzambi, nyewù ntonda mpindyewu bilèma byànyi?”

95 Kùdikù bidimba kampàndà byà civùmvù byà èkèleeziyà bìdì biya mu èkèleeziyà ditùkù dyònsò, ne pàmwàpa bateèta bwà kwikala bafwàne Nzambi ne mwàbò mwònsò, kàdi nànsha nàнку wèwè mumanyè ne cijji aci ne dibènga kucyùkà dyà maalù, ne citù, biibidilù bìdì ànu bikubàmbidikile panshi mu mùshindù wà kùyì ne bucimunyi anyi? Udikù mufwànyine kuswà bwà kusukudiibwa kùdi Mashi, dilòlò edi, ku byònsò abi anyi? “Bwalu mukuukwidi pàkaadiye mumàne kukezudiibwa kàcyèna kàbidì ne civùlukilu...” Udikù mwà kwela cyanza muulu anyi, wèwè cidimba cyà èkèleeziyà? Nzambi àkubènèshè, inàbànza. Elà byanza muulu wàmbè ne: “Mwanèètù Branham, wamvùlukakù mu disambila.” Nzambi àkubènèshè, inàbànza. Ncyà bushùwà. Aci’s ncilelèlà... Aci’s ncintu cilelèlà cyà kwenza. Nzambi àkubènèshè lwà paanyimà pààpa, mukalenge.

96 Muntu mukwàbò èlè cyanza muulu, wàmbè ne: “Mfwilèku luse, Nzambi. Ndi mumanyè ne ndi njikula bwena Kilistò, kàdi ncyèna naabù mu nsòmbelu to. Ndi mumanyè ncyèna naabù to. Ne munda mwà mwoyi wànyì, ncyà bushùwa ne ncyèna mukùmbàne kumpalà Kwèbè to. Ndi muswè kwikala umwe wa ku basungula bàà Nzambi. Ndi ndyùmvwa mu mwoyi wànyì emu ne ki cìndì, kàdi kacya ncitukù mwanjì kutèeka ku luseke majitu adi manjìngile bipeepèle nànsha. Kàdi ndi muswè kuatèeka ku luseke dilòlò edi. Nènku, ku ngàsà wa Nzambi, nèncyènzè. Nsambidilèku.” Udiku mwà kwela cyanza muulu anyi? Nzambi àkubènèshè, inàbànza. Muntu mukwàbò. Ànu kakesè cyanàana, tudi bindile.

97 Patùcidì bindile mu cinyàanya apa, muntu yònsò mpindyewu ne mitù yènù miinyika mu disambila, bitùùlùbitùùlù ìmbilaayi eci mu matàma mpindyewu:

Kùdi Mpokolo mùlè ne Mashi,  
Makòka mu mijilu yà Emanùwèlè,  
Nènku bangènzàmpèkàatù biinyija mwinshì  
mwawù... .

Bàdi bàjìmija makeji ààbò ònsò à dipiila,  
Bàjìmija . . .

<sup>98</sup> Kwéna mwà kwelanganakù meeji pa bwalu abu mpindyewu mene anyi? Kuteeci kuàkupula to. Kilistò udi pa byanza byèbè.

<sup>99</sup> Pilààtù wáciteeci, mu dindà emu, lwà pa díbà isambòmbò jaajaaja apa; kàdi byanza byèndè bìcidi ànu ne mashi, mupiiile ku mashi. S'nudi bamanyè cyàkamwenzekelà. Wàkaya mu Suisse, paanyimà pàà bidimu byàbùngì, kujìmijayè lungènyi, kudyèlayè mu dijiba dyà màyi e kufwàye. Mu dindà emu, mu Suisse, nkàma yà bantu yitu yilwa bwà kubandila mwandà awu, màyi a bleu àdi àsàba aya muulu ùmuukila mwinshì mwà ciinà cinènè cyà màyi aci. Bātu bàyakù cidimu cyònsò eci. Mmwanu wà kale mwela, bàdi bàmba ne Nzambì wàkabènga bwà màyi kukezulawù byanza byèndè abi.

<sup>100</sup> Mwanèètù, nànsha wèwè mubàtìijìibwe misangu búngì munyì, cyònsò cyùdi uteeta kwenza aci, cintu nànsha cimwè kacyakukezulakù byanza byèbè to pa kuumusha Mashi à Kilistò. Nzambì wàkacibènga. Nènku màyi à bleu awu, paanyimà pàà bidimu, bitwè ku binunu bìbìdì, àcidi ànu àsàba àtùtuka. Nzambì mmucibènge. Bwakànè bwèbè wèwè mwinè kabwèna mwà kukezula mpèkaatù yèbè to. Kakwèna cintu nànsha cimwè to pa kuumusha Mashi à Yesù! Elàngànaayikù meeji pa bwalu abu mpindyewu. Netwìkalè mwà kusambila, katanci kakesè cyanàànà.

<sup>101</sup> Ndi ndìkonka ní ndi mufwànyine kulòmbakù cintu kampàndà dilòlò edi. PààkiimanàYe mwaba awu mu cibambalu cyà cilumbulwidi cyà Pilààtù, mu dindà edi, kwamba ne: “Bu ne Bukalenge Bwànyì bùvwa bwà pa buloba ebu, Mvwa mufwànyine kwambila Taatù Wanyì ne Úvwa dyàkàmwe mufwànyine kuNtùmìna bisùmbù dikùmi ne bìbìdì byà Banjèlo.” Pàvwàbì ne, umwèpelè wa kùdìbo uvwà mwà kubùtula buloba's. “Mvwa mufwànyine kuMwambila, ne bisùmbù dikùmi ne bìbìdì byà Banjèlo bìvwa bifwànyine kwikala dyàkàmwe biNtèekela.” Yèyè's ùvwa mufwànyine kwikala mucyènzè. Kàdi Yèyè wàkiimana mwaba awu, mupòle ne mudìpwekèshè, bwà kwangata lufù lwèbè ne kwangata mpèkaatù yèbè.

<sup>102</sup> Udikù mwà kwikala ne kusàkidila kukùmbàne bwà Mulàmbù awu dilòlò edi, wèwè udi mu lukèngelu lwàci, udi mu lukèngelu lwà mabènèsha à Nzambì awu, udikù mwà kujuukila kuulu bwà disambila edi anyi? Juukilà ànu kuulu, wèwè ùdì muswè bwà bàkuvùlùke mu disambila edi awu, wamba ne: “Nzambì, ikàlàku nàanyi luse. Ndi mupiiile, ndi mwenzè bintu bìbì, ne ndi mpindyewu muswè kwitaba difwidiibwa dyànyì dyà luse mu Kilistò Yesù.” Udikù mwà kujuukila kuulu pa díbà edi anyi? Nzambì àkubènèshè, wèwè nsongààkàjì. Aci's ki bukìtù. Shààla ànu mwimànyine kuulu mwaba awu.

<sup>103</sup> Udi uswa kungambila ne udi mwelè cyanza kuulu, kàdi kùyi pashiishe ne meeji matòòkè makumbàne bwà kwimanyina kuulu anyi? Ndikwàcisha kàayi dikaadiku Èvànjeeliyò naadi kùdi? Kaa, manàyi a mùshindù awu ne èkèlezìyà, manàyi ne Nzambi! Àbìdì aa dībà dikaadi pabwīpi, dimwè dyà ku matùkù adi panshi àà bômbè bwà mushindà nebùdikùmè apa mu mwaba kampàndà, mu cimwè cyà ku byàpù binènè byà tupyà twà bingoma ebi. Kakwàkwikala nànsha kapwishipwishi kàmwè kà dībà bwà kwelangapù meeji to. Dībà adi dībà nedīikalè dimanè kupīta, ne pàmwāpa kumpàlà kwà Paasàkà ulwàlwa ewu, anyi ewu Paasàkà. Kwènàku muswè kjuukila kuulu mpindyewu, kwamba ne: “Nzambi, ikàlàku nàanyi luse, mèmè ngènzàmpèkàatù. Ndi mpindyewu ngiitaba Kilistò, ku didilàmbula Dyèndè bu difuta dyà cibawu bwà mpèkaatù yànyi. Ne ku ngàsà Wendè, ne ku ngàsà Wendè nkàayendè, nkùndi nshàala mu Bwikadi bwà Nzambi.” Udikù muswè kutonda bilèmà byèbè anyi? Ewu wàsokoka mpèkaatù yèndè kàakutanta to. Ewu udi utonda mpèkaatù wèndè, ùdi ùpeta luse. Aci ncikutàngile. Yèyè mmutàngile.

<sup>104</sup> Mpindyewu, Mukalenge wètù Mubènèshīibwe, mu nombà musungùlùkè dilòòlò edi mmwimàne misùùkà yisàtù yidì ne kanyinganyinga, mulùme umwe ne bakàji bàbìdì.

<sup>105</sup> Mùndì ngeela meeji, Mukalenge, bwà Kàlvariyo, pàvwà umwe uvwa ku luseke lùmwè awu, mwambè ne: “Mukalenge, wamvùlukakù paWàbwelà mu Bukalenge Bwèbè”; mukwàbò kwabayè ne: “BiWikalà nàku, tùmonebi cishimà, tùtùulùlèbi ku nkùrusè ne disungilebi Wèwè mwinè.” Kàdi mukwàbò kwabayè ne: “Nzambi, ikàlàku nàanyi luse.” Ki mutù Wèbè kwaminawù ku luseke lwà dyàbalùme, kwamba ne: “Leelù ewu newikalè Nàanyi mu mpàlàdiizò.” Kàdi Wèwè wakashàala viiviivi kùdì mukwàbò awu, bwalu kakùvwa kanyinganyinga to.

<sup>106</sup> Nènku, Taatù Nzambi, ndi ndòmba bwà ne pàmwāpa aba . . . Nèntwishīibwè ne bàdi anu bàsàtù aba mu citanda emu, bàdi bàdyùmvwà ne bàdi bàkèngela kutonda bilèmà byàbò. Kàdi ne mbalwè mu mùshindù wùdì mukumbàne mu byònsò, wà njila wà nkùrusè. Bāfwilèku luse, Mukalenge, ubàbènèshèku. Mbiimàne kaaba aka dilòòlò edi; bu mu Wàkiimanà bwàbò bôbò, mu cibambalu cyà cilumbulwidi cyà Pilàatù amu; mu Wàkiimanà bwàbò bôbò, pankaci pàa Maulu ne buloba, pàakabwelà dībà ne ngondo kubengayè kufila bukènkè bwèndè, ne cilàmbà cikùdika cyà mu ntempèlò kupandikaci kubangila kuulu too ne kwīnshì. Nzambi, ndi ndòmba ne, Ùbàbènèshèku ne ùbàpèku luse Lwèbè, ne ùbàkèzùlèku ne Mashī Ebè. Ne bàbàtiizèku ku Bukolè Bwèbè bujididi, mu Mubidi wà Mwàn’Èbè Sungasunga, Kilistò Yesù, dībà adi bàdi bàkùbiibwa mu bikondo too ne Cyèndèlèlè. Bèneshàku bakwàbò bàdi bàdyùmvwà ne bàdi bimpè abu, ne bàkaadi bamanè kukumbàja cyòci eci ne benzè

nànkù. Ndi ndòmba bwà dibènesha edi diye kùdìbo, mu Dîna dyà Kilistò. Amen.

<sup>107</sup> Nzambi ànubènèshè. Ne nwênù bàdì biimàne pabwîpì ne bàvwà bajuukile kuulu abu, olòlaaayi cyanza nùlabulanganèku naabò ku cyanza, muntu kampànda, wamba ne: “Mukalenge àkubènèshè,” ncyà bushùwà, bu mwoyi wà bwobùmwe.

<sup>108</sup> Tukàadi mpindyewu ànu dîbà dipite ndambù mu masangisha ètù. Mbanganyi bàdì banangè Mukalenge Yesù, bèlè byanza muulu? Ndi ndikònka, mu cimùmà mpindyewu, anyi bapòlòbèle ne mwètù mwònsò, mu divùluka dyà Yèyè Ûdi myaba yònsò, udi kaaba aka dilòlò edi awu, ní tudikù mwà kwimba bitùulùbitùulù:

Kùvwa nku nkùrusè kwàkafwilà Musùngidi wanyì,  
Nkùngààkadilà bwà kukezudiibwa ku mpèkaatù;  
Kwòkù aku ku mwoyi wànyì... (Paùvwa mùkùmbàje cìdì cilòmbiibwè, mùtentèkàPu byanza,) Kwòkù aku nkwàkalaabiibwà Mashì pa mwoyi wànyì;  
Kaa, butùmbì kùdì Dîna Dyèndè!

Twìmbàayi bitùulùbitùulù mpindyewu, patùdì twinyika mitù yètù kùdì Ya apa.

Ku nkùrusè kwàkafwilà Musùngidi wanyì,  
Nkùngààkadilà bwà kukezudiibwa ku mpèkaatù;  
Nkwàkalaabiibwà Mashì pa mwoyi wànyì;  
Butùmbì kùdì Dîna Dyèndè!  
Butùmbì kùdì Dîna Dyèndè! (Dîna dyà mushinga mukolè!)  
Butùmbì kùdì Dîna Dyèndè dyà mushinga mukolè!  
Nkwàkalaabiibwà Mashì pa mwoyi wànyì;  
Butùmbì kùdì Dîna Dyèndè!

<sup>109</sup> Mpindyewu mu cimùmà, ne mitù yènù miinyika. Wèwè udi musùngidiibwe awu, ambà ne:

Kaa . . .

Elà cyanza muulu mpindyewu.

Kaa, Mpokolo wa mushinga mukolè udi usùngila ku mpèkaatù!  
Ndi nsànka bikolè mûndì mubwelèmu;  
Mwômù amu Yesù ùdi ùnsungila ne ùndama mukezùke;  
Butùmbì kùdì Dîna Dyèndè!

Butumbi kùdì Dìna Dyèndè dyà musinga mukolè!

Butumbi kùdì Dìna Dyèndè dyà musinga mukolè!

Nkwàkalaabiibwà Mashi pa mwoyi wànyì;  
Butumbi kùdì Dìna Dyèndè!

<sup>110</sup> Mpindyewu ne byanza byènu bipwekesha, mitù yènu miinyika. Mvwa ànu ngeela meeji's; muntu kampànda mmubiikile mu katanci emu, wamba ne muntu kampànda ùvwa muswè bwà bàmuwùlùkèku dilòòlò edi mu disambila, bwà mubidi wèndè. Kàvwa muPETÈ mùshindù wà kwalukila mu disangisha dyà mu dyàlumingu dilòòlò to, bwà mudimu munènè wà dyondopa awu. Udikù mwà kujuukila kuulu anyi, wèwè udi muswè bwà bàkuvùlùkè mu disambila adi mpindyewu mene awu?

. . . ku mwoyi wànyì nkwàkalaabiibwà Mashi;  
Butumbi kùdì Dìna Dyèndè!

Butumbi kùdì . . .

<sup>111</sup> Mpindyewu ne mitù yènu miinyika. “Wàkatàpiibwa mpùtà bwà dishipa dyèbè dyà mikenji, muzaajibwe bwà bubì bwèbè, dinyooka bwà ditalala dyèbè dyàkapòna pambidi Pèndè, ne ku mibùndàbùndà Yèndè nkunwàkwondopiibwà.”

Butumbi kùdì Dìna Dyèndè!

<sup>112</sup> Mpindyewu, Taatù Mubènèshìibwè, patùdì tuseemena ne didipwekesha dyònsò ku nkùrusè mpindyewu mene apa, kwàkampetelà ngàsà ne luse aku, kwòkù aku nkùdì Mutòòtò wùdì Wùbàlakanà wà mu Dìndà wùfila nsèsà yàWù mu nyungulukilu wanyì. Babèèdì aba mbiimàne mu Bwikadi Bwèbè. Mbiitàbùùje patùdì twakulangana apa ne, ku diitabuuja, mbatàngile mwongù mwela mibùndàbùndà awu, kuntu kwàka. “Ne ku mibùndàbùndà Yèndè twàkwondopiibwà.” Taatù Mutàmbe Cijila, tudi tulwa biikàlè tujìkula diitabuuja dyètù, twitabuuja ne Wèwè udi wondopa mibidi yètù yìdì yìsaamà, ku bisaamà binènè bitùumvwila kùdì Mukalenge Yesù. Nènku tudi tulàmbwila bantu bàdì biimane aba, disambila dyà diitabuuja, diWàkalayà ne ndìvwà mwà kusungila babèèdì adi. Nènku tìwètù, pàmwè, bu beena kwitabuuja Bèèbè badyènzè cimùkù dilòòlò edi. Wèwè wàkamba ne: “Mwaba wònsò wùdì bàbìdì anyì bàsàtù badìsangìshe, Mèmè nèngìkalè munkaci mwàbò.” Nènku tudi tubàlòmbela luse, bwà ne ngàsà Wèbè wàmònakù mpindyewu mwà kulenga musùukà wàbò wà munda menemene, bwà cintu kampànda cyèlèku lwongò mu ndòndò menemene; bwà bàmanyakù ne Kilistò ùdì kaaba aka ne wakùlwàngànyì naabò, wamba ne: “Mwàn'Àanyì, Ngàkuumusha bubèèdì bwèbè ku Kalvariyo kwàka. Mpindyewu ngiiMikilaaku ntàtù yèbè yònsò, bwalu Mèmè ndi nkwelela meeji.” Nènku swàku bwà

bòndopiibwè, mu kaabujimà, bwalu tudi tulòmba nùнку mu Dìna dyà Yesù. Amen.

<sup>113</sup> Nèнку pàdìbo basòmbe mpindyewu apa, muntu kampànda pabwìpì naabò, àbàtentèkèlèku byanza, muntu uvwa ubàsambidila awu. Bible mmwambè ne: “Nebàtentekelè babèèdi byanza; babèèdi nebàsangalè.” Mukalenge ànùbènèshè.

<sup>114</sup> Mémè nciyi mutùpàkàne to, ncyèna mutàngile muntu uvwa mwondòpiibwe mwaba ewu kùkaadi matùkù àbìdi, anyi maadyàlumingu àbìdi, uvwa mpudimaci anyi ne cintu kampànda mu maci awu anyi? Ndi nkumòna usànkila disangisha dilòòlò edi. Udi ungumvwa bilenga mpindyewu anyi? Mbìmpè. Bilenga be! Anji juukilaku ànu kuulu bwà katanci kakesè cyanààna. Mbanganyi bàdi bavùlùke ne yèyè ewu ùvwa kaaba aka? Ne yèyè ùvwa mupicile mu mulongo wa babèèdi, balwè nendè pa cibumbà cyà ku cyambilu, nèнку Mukalenge mumwondòpe ne mumusàngajè. Mukalenge abèneshiibwe's we! Twasàkidila, mwanèètù wa balùme, bwà bujaadiki bwèbè. Mbifwànyine kwikala makùmi! Kàdi Yèyè kì mmulenga wa dikèma anyi?

<sup>115</sup> Mpindyewu, tudi baswè kunumòna mààlabà dilòòlò, kumpàlà kwà dìbà. Ne pashiishe mu dyàlumingu mu dindà, kumpàlà kwà dìbà. Mu dyàlumingu mu mapingaja, ne bu nwènù mwà kwalukila bwà disangisha dyà dyondopa dyà mu dyàlumingu dilòòlò. Too ne patwàsangilà, swàyikù twimanyinè kuulu ne twìmbààyi musambu wètù wà ditangalajangana naawù ne, *Angàtà Dìna Dyà Yesù Wèndè Naadi* awu.

Angàtà Dìna dyà Yesù wèndè naadi,  
Wèwè mwànà wa kanyinganyinga ne dikènga;  
Nedìkupè disànkà ne busàmbi . . .

Kùdìmukààyi ànu cyanààna nùlabulè bantu bònsò ku cyanza mpindyewu.

Ndà nààDi kwònsò kùyaayà.

Dìna dyà mushinga . . .

Kùdìmukà ànu cyanààna ùlabulanganè ku cyanza.

. . . Kaa dyà bupòle be!

Ditèkemena dyà buloba ne disànkà dyà Dyulu;

Dìna dyà mushinga, (Dìna dyà mushinga!) Éyì

dyà bupòle be! (Dyà bupòle be!)

Ditèkemena dyà buloba ne disànkà dyà Dyulu.

Mpindyewu tàngilààyi mu nùнку ewu.

Twinamina Dìna dyà Yesù,

Tupòna mikookwela ku makàsà Èndè,

Mfùmù wa bamfùmù mu Dyulu netùMwasè

cifulu cyà butùmbi,

Pààjika lwendu lwètù.




Dîna dyà musinga, Éyì dyà bupòle be! (Éyì  
dyà bupòle be!)

Ditèkemena dyà buloba ne disànkà dyà Dyulu;  
Dîna dyà musinga, Éyì dyà bupòle be! (Dyà  
bupòle be!)

Ditèkemena dyà buloba ne disànkà dyà Dyulu.

<sup>116</sup> Mpindyewu nwavùlukaayi kòralè wà Neville, cisùmbù cyà biimbi bàà misambu bànaayi aci mu dindà, WLRP, pa dîbà citèèmà. Nènku wà Mwanèètù Stricker udi pa dîbà citèèmà ne tusuunsa makùmi ànaayi ne tùtaanu, mu dindà dyà dyàlumingu. Mvwa ànu munkaci mwà kumukwàcila mukaba wà mèyì mu mapingaja emu, pa dibìikà dyà ku lufù.

<sup>117</sup> Nènku mpindyewu, too ne patwàsangilà cyàkàbìdì, mabènesha à Mukalenge ìkalè nèènù, patùdì twinyika mitù yètù apa. Nènku nèndombè mulundà wanyì mwîmpè ne mwanèètù, Mwanèètù Palmer, wa ku Macon, mu Géorgie, ní ùdikù mwà kutangalaja batèèleji aba ne mwakù wà disambila, patùdì tusambila apa. Mwanèètù Palmer. 

*BUPWÀNGÀNE* LUA57-0419  
(The Perfection)

DILONDANGANA DYÀ MALONGESHA PA DITÀBULUJA DYÀ PAASÀKÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dilòlò dyà Diitànù Dinsantu, matùkù 19 a ngondo mwînâyì, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)